

**Nunatsinni innarluutillit ilinniartitaanikkut suliffeqarnikkullu atugaannik misissuinerup kingusinnerpaamik UPA 2020-mi saqqummiunneqarnissaanik Inatsisartut aalajangiiffigisassaattut siunnersuut. Ilinniarfiusinnaasutut suliffiusinnaasutullu piukkunnaatillit qanoq tapersersorneqartiginerannik aammalu inunnit pineqartunit inuiaqatigiinnillu pisariaqarneratut atorneqartiginerannik erseqqinnerusumik qulaajaanermik misissuineq imaqassaaq, soorluttaaq misissuineq innarluutillit ilinniartitaanerannut suliffeqarneranullu tunngasumik siunissami ilisimasaqalernissamut qulakkeerinnittumik aalajangiisoqarneranik malitseqartinneqassasoq.**

(Inatsisartunut ilaasortaq Aqqa Samuelson, Inuit Ataqtigiiit).

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

### **Aappassaaneerpeqarnera**

Ilaqutariinnermut Peqqissutsimullu Ataatsimiititaliaq suliamik suliaqarsimanerannut Naalakkersuisut qutsavigaat.

Inunnut innarluutilinnut suliassaqarfimmi oqartussaasoqarfiit assigiinngitsunik suliallit akornanni pitsaanagerusumik suleqatigiittoqartarnissaanik qulakkeerinninnissarput pillugu Naalakkersuisut Ilaqutariinnermut Peqqissutsimullu Ataatsimiititaliaq isumaqatigaat. Innuttaasoq innarluuteqartoq siullerpaamik innuttaasuvoq, aamma inuk innarluutaanngitsoq, ukkatarissagatsigu pingaaruteqarpoq.

Nunami maani inuit tamarmik – aamma inuit innarluutillit – ilinniartitaanissamininnik suliffeqarnissaminillu pisinnaatitaaffeqarput. Aamma tamatuma piviusunngortinneqarnissaata periarfissaqarnissaa qulakkiissavarput.

Inuit innarluutillit ilanngunneqarnissaat oqaluserigaangatsigu, aaqqiissummik ataatsimik tamanut atuuttumik aaqqiissuteqarnissaq oqaluserissannginnatsigu pingaaruteqarpoq erseqqissassallugu. Eqimattat taakku inunnik assigiinngitsorpassuarnik katitigaapput assersuutigalugulu eqqarsartaatsimikkut piginnaasakillimasunik, timimikkut piginnaanillimasunik aamma tarnimikkut piginnaanikillimasunik ilaqarlutik. Pingaarnertut suussusilersuinerit taakku iluanni taamatuttaaq ataasiakkaat piginnaaneqarnerat, pisariaqartitaat kissaataallu assigiinngitsorujussuupput. Taamaammat suliniutit assigiinngitsorujussuit aallartinneqartariaqarput.

Suliniutissat aallartinneqarnissaannut aallaqqaataasutut massakkullu pissutsit pillugit aamma suliffeqarfeqarfimmi ilinniartitaanermullu suliassaqarfimmi peqataaneq pillugu suliassaqarfiup qulaajarneqarnissaa pisariaqarpoq.

Ilinniarfiusinnaasutut periarfissat kiisalu suliffiusinnaasut aamma tapersersuineq pisariaqartitsinnermut naapertuunnersoq pillugit qulaajaanermik suliat massakkut aallartinneqareersut ilaneqarnissaat pillugu Ilaqutariinnermut Peqqissutsimullu Ataatsimiititaliaq allannguutissatut siunnersuutaat Naalakkersuisut akuersaarpaat.

Taamatut oqaaseqarlutik Ilaqutariinnermut Peqqissutsimullu Ataatsimiititaliap  
allannguutissatut siunnersuutaa akuersissutigineqassasoq Naalakkersuisut innersuussutigaat.